

दिनांक : 07.02.2026
 समय : 18.45 बजे
 आकाशवाणी जयपुर-अजमेर ऊं पेश है
 प्रादेशिक समाचार

खास समाचार

- केन्द्रीय जल शक्ति मंत्री सीआर पाटिल कह्यो-शेखावाटी हलका ने यमुना नदी रो पाणी मिलेला-ई सारु बेगी ई डीपीआर बणायी जावेला।
- मुख्यमंत्री भजन लाल शर्मा भरोसो दिरायो के राज्य रो आवतो बजट कारोबारियां रो भलो करण वाळो अर सगळा रो ध्यान राखण वाळो व्हेला।
- देश मांय आज दलहन आत्मनिर्भरता मिशन सरु व्ह्यो।
- केंद्रीय वन अर पर्यावरण मंत्री भूपेंद्र यादव मौजूदा दौर री चुनोतियां रे मुजब टाइगर संरक्षण नीति मांय बदलाव री जरूरत बतायी।

हरियाणा सरकार यमुना नदी रो पाणी बेगो ई राजस्थान ने मुहैया करावण री मंजूरी दे दीनी है। ई बाबत बेगी ई डीपीआर बणायी जावेला। जल शक्ति मंत्री सीआर पाटिल आज जयपुर मांय खबरनवीसां ने आ जाणकारी दीनी। वे बतायो के तीन पाइप लैण डाल र शेखावाटी हलका मांय पाणी पूगायो जावेला, जिण ऊं ई हलका री पीवण रा पाणी री समस्या आगी व्हेला। केंद्रीय मंत्री आम बजट 2026 री सराहवणा करता थका कह्यो के प्रधानमंत्री नरेंद्र मोदी री अगुवाई मांय भारत दुनिया री तीजी मोटी माली व्यवस्था बणबा जा रही है।

श्री पाटिल 'जल जीवन मिशन' रो जिक करता थकां कह्यो के ई रा तैत हाल तांई 16 करोड़ घरां तांई नळ रे जरिये पाणी पूगा दियो ज्यो है।

0000

मुख्यमंत्री भजनलाल शर्मा कह्यो है के राजस्थान रो आवतो बजट कारोबारियां रो भलो करण वाळो अर सगळां रो ध्यान राखण वाळो व्हेला। वे आज जयपुर मांय बजट-2026 संवाद कार्यक्रम रा तैत कारोबारियां सागे बातचीत रे दौरान बोल रह्या हा। मुख्यमंत्री कह्यो के बौपारी खुद सारु नहीं, बल्कि देश बणावण सारु काम करे है। श्री शर्मा कह्यो के 'राइजिंग राजस्थान' रा तैत करी ज्या पैतीस लाख करोड़ रुपया रा भांत-भांत रा करार मांय ऊं आठ लाख करोड़ रुपया रा निवेश ऊं जुड़्या काम सरु व्हे गया है। वे कारोबारियां ने राज्य सरकार कानी ऊं हर संभव मदद अर साधन मुहैया करावण रो भरोसो दिरायो।

000

प्रधानमंत्री नरेन्द्र मोदी भारत अर अमरीका बीचे लारला दिनां करी ज्या कारोबारी करार ने खुश खबरी बतायी है। सोशल मीडिया पोस्ट रे ज़रिए वे कह्यो के ओ फ्रेमवर्क भारत अर अमरीका बीचे भागीदारी री गहराई, भरोसा अर गतिशीलता ने बतावे है। श्री मोदी कह्यो के ओ भारत रा मेहनती किसानां, कारोबारियां, एम.एस.एम.ई., स्टार्टअप, मछली पकड़बा वाळां अर दूजा लोगां सारु नुवा मौका बणा र 'मेक इन इंडिया' ने मजबूती देवेला। श्री मोदी कह्यो के इण ऊं महिलावां अर नौजवानां सारु मोटी तादाद मांय नौकरी-धंधा रा मौका बणेला।

ई मुद्दा माथे आज नई दिल्ली मांय खबरनवीसां सागे बातचीत करता थकां केंद्रीय वाणिज्य अर उद्योग मंत्री पीयूष गोयल कह्यो के ई करार ऊं नुवा मौका बनेला। श्री गोयल कह्यो के दोन्यू देशां बीचे 500 अरब डॉलर रा कारोबार री आस है।

0000

संघ लोक सेवा आयोग सिविल सेवा परीक्षा 2026 री परीक्षा देवण वाळा रा सुबीता सारू कॉल सेंटर रा कामकाज रो बगत बधा दीनो है। अब ऐ कॉल सेंटर थावर अर दीतवार समेत छुट्टी रे दिना मांय ई संवारे सात ऊं रात 9 बज्यां ताई काम करेला। आयोग रा अध्यक्ष डॉ. अजय कुमार आ जाणकारी दीनी। वे बतायो के उम्मीदवारां री मदद सारू कर्मचारियां री तादाद ई दूणी कर दीरीजी है।

0000

केंद्रीय कृषि मंत्री शिवराज सिंह चौहान आज मध्यप्रदेश मांय अमलाहा ऊं पूरा देश मांय "दलहन आत्मनिर्भरता मिशन" री सुरुआत कीनी। वे राष्ट्रीय दलहन बैठक मांय बतायो के प्रधानमंत्री नरेंद्र मोदी रो संकल्प भारत ने दाळा री उपज मांय खुद रे पाण ऊबो करण रो है ताकि दाळा दिसावर ऊं मंगावण री बजाय वठे भेजी जा सके। श्री चौहान कह्यो के नुवा कारोबारी करार ऊं भारत रा किसानां सारू बरकत रा नुवा गेला खुलेला अर मसालां अर डेयरी उत्पादां री दिसावर मांय बिक्री बधबा ऊं वां री आमदनी मांय बधोतरी व्हेला।

000

केंद्रीय मंत्री भूपेंद्र यादव कह्यो है के टाइगर संरक्षण नीति मांय बदलाव री जरूरत है। वे आज अलवर मांय सरिस्का टाइगर रिजर्व रा क्षेत्र निदेशकां अर मुख्य वन्यजीव प्रतिपालकां रा दो दिन रा सम्मेलन मांय बोल रह्या हा। श्री यादव राष्ट्रीय बाघ संरक्षण प्राधिकरण री लारली 28 बैठकां मांय करी ज्या फैसलां माथे ओजू विचार करण रा हुकम दीना। मंत्री कह्यो के बाघां ने बचावण रा कामां रा 50 साल पूरा व्हेवण परां अब जूनी नीतियां ने मौजूदा दौर री चुनौतियां रे मुजब बदलणो जरूरी है।

श्री यादव बतायो के ई महीना रा आखिर ताई अफ्रीकी देश बोत्सवाना ऊं और चीता भारत लावण री आस है। वे कह्यो के प्रधानमंत्री नरेन्द्र मोदी री अगुवाई मांय बणायी ज्या 'अंतरराष्ट्रीय बिग कैट अलायंस' मांय हाल ताई 24 देश शामिल व्हे गया है। केंद्रीय मंत्री जख्मी जिनावरां अर अनाथ शावकां रा ईलाज सारू रेस्क्यू सेंटर्स बणावण रो मानक ढांचो तैयार करण माथे ई जोर दीनो। ई सम्मेलन मांय राज्य रा वन मंत्री संजय शर्मा अर जंगलात महकमा रा आखा देश ऊं आया आला अहलकार शामिल व्हे रह्या है।

000

श्रीगंगानगर जिला मांय प्रधानमंत्री सूक्ष्म खाद्य उन्नयन योजना रे जरिये किसान ई अब कारोबारी बण रह्या है। कृषि विपणन विभाग रे मुजब जिला मांय किसानां कानी ऊं कारोबार करण सारू हाल ताई 583 अर्जियां मिली है, ज्यां मांय डेयरी, तेल मिल अर गुड़ बणावण रा कारखाना लगावण ओड़ी सब ऊं बत्तो रुझान निजर आयो है। योजना रा तैत खर्च रो 35 फीसदी सब्सिडी अर बिना गारंटी कर्ज मुहैया करावण रा सुबीता दिया जावे है।

000

डूंगरपुर जिला मांय गांवाई हलका री महिलावां रा हुनर ने बाज़ार मुहैया करावण रा मकसद ऊं आज राजसखी वागड़ मेळो सुरू व्ह्यो। जिला री प्रभारी सचिव नेहा गिरी सात दिन रा ई मेळा रा उद्घाटन जळसा मांय कह्यो के खुद सेवक समूहा रे मार्फत महिलावां अब माली तौर ऊं खुद रे पाण ऊबी व्हे रही है।

000

झुंझुनू ज़िला रा पचेरी कलां पुलिस थाणा मांय आज राजस्थान अर हरियाणा पुलिस रा अहलकारां री खास मीटिंग राख्यी ज्यी। झुंझुनू रा एसपी बृजेश ज्योति उपाध्याय आ जाणकारी दीनी। वे बतायो के आवता महीना व्हेवण वाळा पंचायत चुनाव शांति सागे निपख तरीका ऊं करावण रा बारा मांय मीटिंग मांय विगतवार चर्चा करी ज्यी।

000

प्रदेश रा गांवां मांय लगाया जा रह्या ग्रामोत्थान शिविरां मांय लोगां री मोकळी समस्यावां आगी करी जा रही है। जैसलमेर ज़िला रा छत्रेल मांय लगायी ज्या शिविर मांय एक किसान ने तारबंदी योजना रा तैत चाळीस हजार रूप्या री मदद दीरीजी, जिण ऊं अब वां री साखां ने ढांढा-ढोर नी चर सके है। भीलवाड़ा ज़िला मांय प्रभारी सचिव मंजू राजपाल बोर रा खेतां रो दौरा कर र किसानां ने नुवी तकनीक काम लेवण बाबत कह्यो। पाली ज़िला रा गुढ़ाएंदला अर मुंडारा समेत केई हलकां मांय शिविर लगा र गांव वाळा री पीवण रा पाणी अर स्वास्थ्य ऊं जुडी परेशानियां तुरत ई आगी करीजी।

000

पुरुषां री टी-20 विश्वकप क्रिकेट होड़ आज सरू व्ही। भारत अर श्रीलंका री भेळी मेजबानी मांय व्हे रही ई होड़ रा श्रीलंका मांय खेली ज्या पहला मुकाबला मांय पाकिस्तान नीदरलैण्ड्स ने 3 विकेट ऊं शिकस्त दीनी। नीदरलैण्ड री टीम पैली बल्लेबाजी करता थकां 19 ऑवर अर 5 गेंद रा खेल मांय 147 रन बणा र आउट व्हे ग्यी। जवाब मांय पाकिस्तान 19 ऑवर अर तीन गेंद रा खेल मांय 148 रन बणा लीना अर वां रा सात बल्लेबाज आउट व्ह्या। आज ही रा एक ओर मुकाबला मांय वेस्टइंडीज स्कॉटलैण्ड ने 35 रन ऊं शिकस्त दीनी। वेस्ट इण्डीज पैली बल्लेबाजी करता थकां तैय 20 ऑवर रा खेल मांय 182 रन बणाया अर वां रा 5 बल्लेबाज आउट व्ह्या। जवाब मांय स्कॉटलैण्ड री टीम 18 ऑवर अर 5 गेंद रा खेल मांय 147 रन बणा र आउट व्हे ग्यी। आज रा तीजा मुकाबला मांय मुम्बई मांय अब ऊं थोडी देर पछे मेजबान भारत रो मुकाबलो यूएसए ऊं व्हेला।

0000